

दिनांक : 13.03.2026

समय : 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी असम ऊं पीएम किसान सम्मान निधि री 22वीं किश्त जारी कीनी-कह्यो-आ निधि किसानां सारू सामाजिक हिफाजत रो मजबूत जरियो बणी।
- पेट्रोलियम अर प्राकृतिक गैस मंत्रालय भरोसो दिरायो- सरकार ग्राहकां री परेशानियां आगी करण सारू हर संभव कोशिश कर रही है।
- एसओजी थर्ड ग्रेड शिक्षक भर्ती परीक्षा 2022 मांय फर्जी खेल प्रमाण पत्रां रा आधार ऊं नौकरी हासिल करण री कोशिश रा मामला मांय 19 उम्मीदवारां ने पकड्या।
- राजस्थान दिवस रा सिलसिला मांय काल आखा राज्य मांय स्वच्छता अभियान सागे कार्यक्रम सारू व्हेला।

000

प्रधानमंत्री नरेन्द्र मोदी आज असम रा गुवाहाटी ऊं पीएम किसान सम्मान निधि री 22वीं किश्त जारी कीनी। ई रा तैत देश रा 9 करोड़ 32 लाख ऊं बत्ता किसानां रा खातां मांय 18 हजार 640 करोड़ रूप्या ऊं बत्ती रकम भेजी ज्यी। आं मांय प्रदेश रा ई 66 लाख 76 हजार ऊं बत्ता किसान शामिल है, ज्यां रा खातां मांय 1 हजार 335 करोड़ रूप्या ऊं बत्ती रकम भेजी ज्यी। ई मौके प्रधानमंत्री कह्यो के केन्द्र सरकार किसानां रा भला सारू केई योजनावां चला रही है। वे कह्यो के पीएम किसान सम्मान निधि किसानां सारू सामाजिक हिफाजत रो मजबूत जरियो बणी है।

प्रदेश मांय ई पीएम किसान उत्सव दिवस' रो राज्य स्तर रो जळसो जयपुर मांय राख्यी ज्यो। कार्यक्रम मांय मुख्यमंत्री भजनलाल शर्मा कह्यो के राज्य सरकार प्रधानमंत्री नरेन्द्र मोदी री अगुवाई मांय प्रदेश रा किसानां रा विकास सारू लगातार काम कर रही है। मुख्यमंत्री कह्यो के राज्य मांय हाल ताई 22 जिलां रा किसानां ने दिन मांय ई बिजली मुहैया कराई जा रही है। मुख्यमंत्री यमुना जल समझौता अर ईआरसीपी परियोजना रो जिकर करता थकां कह्यो के राज्य सरकार किसानां री सहूलियत सारू पाणत अर पाणी रा प्रबंधन रा हलका मांय ठोस काम कर रही है। श्री शर्मा कह्यो के सरकार किसान सम्मान निधि री रकम न्यारा-न्यारा दौर मांय बधायी है अर खेती-बाडी ऊं जुड़ी दूजी योजनावां रा बजट मांय ई बधोतरी कीनी है।

000

देश मांय तेल साफ करण रा कारखानां कने काचा तेल रो पर्याप्त भंडार मौजूद है अर पूर्ति लगातार व्हे रही है। पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा नई दिल्ली मांय खबरनवीसां सागे बातचीत करता थकां आ जाणकारी दीनी। वे कह्यो के भारत पेट्रोल अर डीजल काडबा रा मामला मांय खुद रे पाण ऊबो है अर तेल दिसावर ऊं मंगावण री कोई जरूरत नी है। संयुक्त सचिव भरोसो दिरायो के सरकार ग्राहकां री समस्यावां आगी करण सारू लगातार कोशिश कर रही है। ई बीचे केंद्रीय संस्कृति अर पर्यटन मंत्री गजेन्द्र सिंह शेखावत होटल अर पर्यटन उद्योग ने साता देता थकां होटलां-ढाबां ने गैस री पूर्ति बधावण रो ऐलाण कीनो है।

श्री शेखावत आज नई दिल्ली मांय पेट्रोलियम अर प्राकृतिक गैस मंत्री हरदीप सिंह पुरी सागे मीटिंग कर र गैस री पूर्ति रा मौजूदा हालात माथे चर्चा कीनी। वे बतायो के कारोबार सारु हर महीना गैस री औसत जरूरत रो करीब बीस फीसदी हिस्सो आज ऊं ही मुहैया करावणो सुरु कर दियो जावेला। शेखावत कह्यो के दुनिया रा न्यारा-न्यारा हलकां मांय चाल रही लड़ाई रे कारण पूर्ति माथे असर पड़यो है। प्रदेश मांय ई रसोई गैस री पूर्ति तैय करण सारु प्रशासन लगातार निगराणी कर रह्यो है। भीलवाड़ा अर अजमेर समेत केई जिलां मांय गैस री टंकियां री उपलब्धता रा बारा मांय जिला कलेक्टर हालात साफ कीना। भीलवाड़ा रा जिला कलेक्टर जसमीत सिंह संधू बतायो के जिला मांय रसोई गैस रो जरूरी भण्डार मौजूद है अर लगातार पूर्ति करी जा रही है। अजमेर मांय जिला कलेक्टर लोकबंधु अर एस.पी. वंदिता राणा गैस एजेंसियां रा दफतरां रो दौरा कर र टंकियां रा स्टॉक अर वितरण व्यवस्था रो जायजो लीनो। कलेक्टर बतायो के जिला मांय रसोई गैस री न्यारी-न्यारी एजेंसियां री जांच सारु अहलकार तैनात करी ज्या है। जिला कलेक्टर जनता ऊं अफवाहां माथे ध्यान नी देवण अर घबराहट रे कारण बुकिंग नी करावण री अपील कीनी।

000

राज्य मांय प्रोजेक्ट ग्रेट इंडियन बस्टर्ड रा तैत संरक्षण प्रजनन कार्यक्रम रा तीन साल पूरा व्हे गया है। केंद्रीय पर्यावरण मंत्री भूपेंद्र यादव बतायो के जैसलमेर रा केंद्र मांय ई सप्ताह दो नुवा चूजा जन्म्या है। ई सागे ई आं परिन्दां री तादाद 70 व्हे गयी है। आं मांय ऊं एक चूजो कुदरती तरीका ऊं अर दूजो कृत्रिम गर्भाधान रे ज़रिए जन्म्यो है। श्री यादव ई उपलब्धि सारु वन विभाग रा अहलकारां ने बधाई दीनी है। वे बतायो के ई साल केंद्र मांय पाळी ज्या कुछ चूजां ने न्यारा-न्यारा दौर मांय जंगल मांय छोड़्या जावेला।

000

भरतपुर रा केवलादेव राष्ट्रीय उद्यान मांय लम्बा आंतरा पाछे साइबेरिया ऊं आवण वाळा परिन्दा बैकाल टील निजर आया है। उद्यान रा निदेशक चेतन कुमार बतायो के अ रंग-बिरंगा परिन्दा हजारों किलोमीटर रो सफ़र तय कर र वठे पूग्यो है। चेहरा माथे 'पेंटेड मास्क' सरीखा आकार सारु मशहूर ई प्रजाति रा परिन्दां रो निजर आवणो जंगली जिनावरां रा जाणकारां सारु खास अहमियत राखे है।

000

पुलिस रो स्पेशल ऑपरेशन गुप-एसओजी थर्ड ग्रेड शिक्षक भर्ती परीक्षा-2022 मांय खेलकूद रा फर्जी सर्टिफिकेट रा आधार ऊं नौकरी हासिल करण री कोशिश करण रा मामला मांय 19 उम्मीदवारां समेत 20 जणा ने गिरफ्तार कीना है। पुलिस रा अतिरिक्त महानिदेशक विशाल बंसल बतायो के ताईक्वाण्डो खेल रा फर्जी सर्टिफिकेट अर वां री झूठी वेरीफिकेशन रपट रे ज़रिए खिलाड़ी कोटा ऊं मास्टर री नौकरी हासिल करण री कोशिश करीजी ही। एसओजी री टीम काल राज्य रा 14 जिलां अर हरियाणा मांय न्यारी-न्यारी ठौड़ां एके सागे छापा मार र आं आरोपितां ने पकड़्या।

000

राजस्थान दिवस रा सिलसिला मांय काल आखा राज्य मांय सप्ताह भर चालण वाळा जळसा सुरु व्हेला। 19 मार्च ताई चालण वाळा आं आयोजनां रे दौरान साफ-सफ़ाई, खेल-कूद अर सांस्कृतिक कार्यकमां रे ज़रिए प्रदेश री कला अर विरासत रो दरसाव कर्यो जावेला। डीग रा नेहरु पार्क मांय

काल ज़िला स्तर रो स्वच्छता सप्ताह सरु व्हेला, जद के 15 मार्च ने संवारे जलमहल गेट ऊं 'विकसित राजस्थान दौड़' राख्थी जावेला। ज़िला मांय विद्यार्थियां सारु डिजिटल सवाल-जवाब, चित्रकारी अर भाषण री होड़ां सागे 'एक जिला एक उत्पाद' प्रदर्शनी ई लगायी जावेला। जैसलमेर ज़िला मांय ई काल सरु व्हेवण वाळा स्वच्छता सप्ताह रा तैत ग्राम पंचायत अर ब्लॉक लेवल सागे सरकारी दफ्तरां मांय ई साफ़-सफ़ाई रा अभियान चलाया जावेला।

000

बालोतरा री एक कपड़ा फ़ैक्ट्री रा स्लज टैंक री सफ़ाई रे दौरान जहरीली गैस रा रिसाव रे कारण तीन मजूरां री मौत व्हे गयी। कारखाना मांय सफ़ाई सारु टैंक मांय उतर्या मजूर गैस रिसाव रे कारण बेहोश व्हे गया, ज्यां ने तुरत सरकारी अस्पताल ले जायी ज्या जठे डॉक्टर वां री मौत रो ऐलाण कर दीनो।

000

रेल मंत्री अश्विनी वैष्णव कह्यो है के देश मांय 77 फीसदी गाड़ियां तैय बगत ऊं चाल रही है। वे आज राज्यसभा मांय प्रश्नकाल रे दौरान एक सवाल रा जवाब मांय आ जाणकारी दीनी। वैष्णव कह्यो के गाड़ियां री टेमसर आवण-जावण रो मापन तैय बगत माथे पूगण वाळी गाड़ियां रा प्रतिशत ऊं कर्यो जावे है। रेल मंत्री बतायो के रेलवे सेवा मांय और सुधार सारु केई रणनीतियां अपनायी है।

000

प्रदेश मांय काल कठे-कठे अंधड़ चालण अर बारिश व्हेवण रा आसार है। अजमेर, जयपुर अर भरतपुर संभाग सागे शेखावाटी हलका मांय कठे-कठे बादळां री गाज़ सागे आंधी-बारिश र आसार है। मौसम केन्द्र जयपुर रा निदेशक राधेश्याम शर्मा बतायो के काल ई केई ठौड़ां बादळा मंड्या रेहवण सागे बायरो बाज्यो, ज्यीं कारण पारो एक-दो डिग्री सेल्सियस उतर्यो।

000